

QUÆSTIO MEDICA.

Quodlibetariis Disputationibus manè discutienda in Scholis Medicorum, die Jovis vigesimo-nono Novembris.

M. FRANCISCO-ANTONIO LE DRAN,
Doctore Medico, Præside.

Confert-ne ventriculi motus, ad elaborationem chyli?

I.

MOTU vivunt animalia, motu pereunt. Humores scilicet & spiritus agitatione continuâ vitæ functiones absolvunt: sed præcipiti dum cursu vehuntur, cutis repagula transiliunt; & quâlibet horâ, solidarum quoque partium, quas fugiendo diruunt, corpuscula secum abripiunt. Brevi itaque viventes deficerent, si perpetua hæc tam solidarum quàm fluidarum particularum damna non repararent alimenta. Hæc ideo sicca vel liquida (fame & siti jacturæ majoris interpretibus) appetunt animantes: utraque verò ex varîâ rerum dissimilium congerie genita; diversis enim partibus rescindiendis alimentorum mixtione provideretur. Iniquè igitur de sorte suâ nonnulli queruntur, quod arentes fauces proluere non liceat aquâ, à quibuscumque rerum vicinarum effluviis expeditâ; vel quod nullis aurum disfluat liquoribus, qui possint impunè ventriculo committi. Vix enim utile quidquam nutritioni pura conferunt elementa, vel metalla, aurum omnium minimè; quippe quod sibi pertinaciter cohæret, quia similibus ex partibus coalescit, nulla corporis alieni societate discretis. Ne credas tamen, alimenta quò sunt pluribus composita, eò magis esse alendo corpori idonea. Profunt quæ natura congestit, nocent quæ miscet ars gulæ delitiis addicta. Lædunt cornæ dubiæ, & mixta assis elixa, Conchyliæ Turdis. Hæc enim confusa, stomacho tumultum inferunt; & ventriculo vix ex tanto rerum dissimilium acervo chylum elaboranti, negotium ingens faceffunt.

II.

CANDIDO rore quem mammæ nutricis effundunt, nascentes pascimur. Albo liquore quem ventriculus subministrat, toto vitæ decursu rescimur.

Humor ille ex eibis attritis, coctis, expressis effluens, chylus est: ut lacti colore & substantiæ modo, sic & facili unius vicissim in alterum mutatione, congener. Ex lacte nimirum, tenellis infantium, & languidis convalescentium ventriculis, citissimè chylus generatur; nec minùs expeditè, è chylo cum sanguine ad nutricum mammas affluente, lactis penuria reparatur. Ex liquidis ille solidisque manat alimentis; citius quidem & facilius, si mollia & simplicia, longo verò & vehementi ventriculi nisu, si dura & composita devorentur. Cùm enim chylus, ut fiat accommodatum sanguini rudimentum, æqualis, fluidus, & albus evadat necesse sit, quò plura ab hisce conditionibus remota ventriculo traduntur, eò validiori fibrarum contentione dura mollibus, siccis liquida misceat opus est, ut res dissimiles in cremorem unius modi coalescant. Hic si labem aliquam, dum in ventriculo versatur, contrahat; si nimirum, aut febrili calore illi nidor inuratur; aut refluxente è Pancreate succo acrius ebulliens, ace scat, vel resolutis ventriculi fibris, minùs subactus elaboratur; vix aliorum viscerum ope culpa deletur: & licet à crassioribus partibus attritionem aut coctionem eludentibus, à jeuno ad cœcum usque intestinum, expressione successivà libeteretur; & à facibus expeditus yasa destinata subeat: nihilominùs delicta ventriculi luit immerita ctuoris massa,

III.

VENTRICULUM principem esse primæ coctionis officinam, situs ejus & adnexa testantur. Medius est gulam inter unde excipiat alimenta, & intestina quibus illa in chylum mutata committat. Ambitu suo sinum, ad cibos continendos, viscerum omnium capacissimum complectitur. Tantà verò fervidi sanguinis copià è propinquo corde, innumeris arteriis quâlibet discutrentibus, alluitur; calidissimaque illum viscera hepar scilicet, lien, pancreas, immo fons ipse caloris, & ab eo præceps æstuantis sanguinis rivus, tam arctè sovent & ambiunt: ut palam constet, tanto caloris apparatu non privatæ patris incolumitari, sed publico culinarii visceris foco provideri. His porro cùm & salivæ, quæ cibis cum dentibus teruntur, accidit, & liquoris è glandulis gulæ & stomacho appositis decidui, fermentum sit annumerandum; extra dubium est, multiplici adeò caloris incitatione, in ventriculo cibos ad ebullitionem promoveri. Ne tamen illum putes, lebetis instar ardenti foco impositi, effervescentia alimenta otiosum continere: idque unum agere, ut onus suum quàm proximè ambiat, & osculis exactè ob signatis donec in chylum abeat, amplectatur. Neque ut illum ab inertibus vendices otio, ab eo chylum absolvi, fabulosà non minùs quàm inexplicabili substantiæ proprietate contendas. Verùm ut facile, quid ad chylosecos complementum ventriculus conferat, intelligas; ipsius structuram, tunicas, nervos, sedulus inquire. Quæ scilicet media illi est membrana, carposa, & omni fibrarum genere intertexta, uti staminum ordine, multiplici nervorum distributione, & carne tendotum æmula, musculi faciem refert; sic & musculi quoque munus obit: neque solùm rectis fibris rapit alimenta, transversis expellit, obliquis amplectitur, sed omnibus vel simul, vel vicissim agentibus, quadam sui totius in orbem commotione, (velut in compositis musculis contingit) alimenta versat, misceat, attenuat, & tunicæ interioris rugis & tuberculis comminuit.

LONGIUS multo cerebri patet imperium, quàm vulgò solet circumscribi: neque solum in musculos, ad externas corporis partes arbitrio voluntatis agendas, institutos, ab eo spiritus motores influunt; sed in omnia viscera, non secus ac in artus, jus suum proferunt. Viscus nimirum quodlibet, sive membranosum illud sit, sive parenchyma audiat, suis agitur fibris: quibus solutis, aut constrictis, quod amicum est excipit; quod superfluum aut incommodum respuit. Neque enim frustra, vel unius sensus gratiâ qui visceribus obtusior est, tot nervorum propagines in eorum membranas distribuuntur: sed nervi in ipsorum intima perreptantes fibris adnectantur; & eas pro diversâ motus necessitate contrahunt, aut laxant. Unde fit, ut quamquam illæ nesciâ voluntate moveantur, tamen illarum motus, pro variâ imaginationis commotione, sapius ita temperentur, ut in violentis animi pathematis palpitent, vel repente quiescant præcordia. Quod verò privatis partibus ad proprios usus concessum est, publicis officinis, meliorem jure, ad totius æconomiam attributum est. Hinc cor non fibris modò, sed musculis pluribus instructum est, quibus indefinenter vibratur, atque etiam è vivis animantibus evulsum, sanguine vacuum, & lotum diutissimè palpitat: ut ideò, non abs re, illud robustum musculum divinus senex appellavit. Huic densâ carne, & staminum robore proximus est, secundus, avium quæ semina deglutiunt, ventriculus: ex fibris enim ille tam solidis, nervis, & tendinibus musculorum more compactus est; ut vix credat aliquis, tam valida motus instrumenta id solum muneris obtinere, ut grana devorata, quàm plurimum integra, complectatur. Animalium verò utrinquè dentatorum licet ventriculus membranosis visceribus soleat annumerari, si tamen insignes nervorum ramos, qui à sexto pari in carnosam illius membranam discurrunt, si firmam ejus compagem, & nervosam, quâ convestitur, tunicam expendamus; illum faciliè musculi vices gerere, atque etiam validos, ad chyli elaborationem, posse motus obire intelligemus. Nec absurdum videtur, hisce partibus motum earum functionibus idoneum, à nervis mutuatum, adscribere, quæ in histericis, & melancholicis affectibus, nervorum irritatione, tam vehementer convelluntur, ut lienis, intestinorum, uteri, cordis & stomachi concussiones, oculis etiam & tactu manifestè percipiantur.

V.

TANTI motus est ad absolutum primæ coctionis opus, ut ex quo cibi animantium ora subierunt, nusquam moveri desinant. Primum enim dentibus in ore comminuuntur: mox linguâ & asperiore palati tunicâ, velut limâ, teruntur. Ac demùm continuâ gulæ compressione ad ventriculum traducti; illius agitatione tam diu subiguntur, donec quæ minùs divisa sunt fragmenta attenuentur, fluida solidis, tenuia crassioribus admisceantur; & partes quælibet alimendorum, indefinenti conversione, vim caloris æqualem percipiant, parique fermenti mole perfusæ, similem quoque ebullitionem concipiant. Nec secus ac massa panis, agitatione repetitâ, fermento melius imbuitur; & cerevisia, vinum, aut hydromel, in doliis commota, citius maturefcunt: Ita chylus frequenti ventriculi convolutione, ut albescit, sic & brevi

generosior & perfectior evadit. Adeò ut, quod solà vividi quantumvis caloris ope, & acidi liquoris, licèt tenuissimi beneficio, sine motu, non nisi tediousa temporis morà perficeretur, eo agente prælo melius & citius absolvatur. Hinc quibus animantibus gingiva superior inermis est, ut quæ integra ferè devorant alimenta conficiantur, quadruplici ventriculo provisum est: illa nimirum in ingluvie macerata, quadratis reticuli cristis inciduntur; semilunaribus & asperis omasi membranis teruntur; ut tandem, accedente abomasi compressione, in chylum eliquentur. Sic & avibus quæ vel solidà, vel extimà tantum pelle nudata, grana deglutiunt, duplex adest ventriculus: ut hæc in primo, humore è glandulis vicinis affluente, imbuta, in secundo tunicà molæ instat: fulcatà munito, lapillis juvântibus quos aves absorbent, & actione validà musculorum quibus ventriculus ille constat, in pultem chylosam abeant. Porro, cùm ciborum quidquid ventriculus exceperit, non simul colliquescat; sed sensim partes, quas rugosa illius tunica propius attingit, in chylum dissolvant: partitis quoque vicibus per inferius ejus osculum ejiciuntur, & perpetuâ ventriculi compressione, quod coctum & dilutum est, in intestinà continuò propellitur; ut sic quod super est elaborandum, simili elidente complexu, melius absolvatur.

Ergo ventriculi motus, ad chyli elaborationem confert.

Domini Doctores disputaturi.

M. Franciscus Ponsse.

M. Camillus Falconet, utriusque Aula Equestris Medicus ordinarius.

M. Alexis Littré, Regia Scientiarum Academia Socius.

M. Thomas-Bern. Bertrand.

M. Hyacinth. Theodorus Baron.

M. Petrus Burette, Professor Regius, & à Regiâ Numismatum Academia.

M. Ægidius Adams.

M. Joannes-Nicolaus de la Hire, à Regiâ Scientiarum Academia.

M. Ludovicus Devaux.

Proponebat Parisiis MICHAEL PEAGET Parisinus, Baccal. Medicus, A. R. S. H. 1714.

Typis JACOBI QUILLAU, Universitatis, & Facultatis Medicinæ
Typographi.